

Yakop

¹ Yakop, na Anutu so Waom Yesu Kristo wane qelit ñei, nonjo Anutu wane ñei ñerep, Israel magu 12, din bun wiri yeo yeo kepe banem korop ge arimami, ñinane kibi iwa qewe paki kaiwe maine ñibonmaile.

Mali Malip So Dereret

² Kimakopne! Ñinano liwe liwek so umat kine mane kine mane korop wakonñungi detpi wet peseinerop okaniake.

³ Onoka wane ñine mo detmami, kine kine yalinenjo mali malipñine ma liwekka okan kam-ageki ñadino maki ñinano weleine togole togole wakongi togole more wikile kaukkei.

⁴ Ñinano togole togole wane weleine wakonluke more kaukñune numa kirop yewa ariki, ñine Anutu wane numa kine kine mane wane mi ñaṅaekei, midakaka, ñine maine sot midaine so wet kuneneñ geu kopke ulukeake.

⁵ Ño ñinano ñine manenjo dereret suaine zuangi paki eñe Anutu maine meñenkaki onjo ban mawakone ñeboniake, onoka wane Anutu qomine raraine, don kutne mi ñedan okan maikenjo wet maepkoka korop ma wakone ñebon okanmaike.

⁶ Ño ñine meñenkaikei wane okane, Waom detlukka malipka more meñenkaikei, wet etkeka okane more mida, ño mane eñe wet etkekao meñenkayakeo yemo, kiwetko dibomño teweke

sari kalaŋango rasi pokki momoŋo puangi mida lele arimaike, eŋane meŋe meŋenine rokop yale waka okaniake.

⁷ Nei yaline eŋe Waom wano ŋine kine kine mane mayakane baŋ maikale, ea mo misuk desiake.

⁸ Eŋe wetine loutne wiri yeo yeo pamaike, numa weku mogare kine kine korop mi okan mageake.

Nei Ketkele Wanap So Aboŋ Gorop

⁹ Doku tau tau ketkele mane eŋe Anutuŋo mawa birakayakane wetpesek desiake.

¹⁰ No doku tau taune ŋei mane aboŋine suaine, eŋe baŋ Anutuŋo maket birakayake, ea wane detki wetine peseake, onoka wane, ŋei aboŋene suaine, simileine manerop detlukmami, eŋe baŋ eki zurauneŋo posi buratke ket okanmaike, yale seuke mida leleake.

¹¹ Kepe deineŋo saki paki sarainane gereuneŋo eki yewa kukusulunŋi zokone zuraune ea buratke qake ketki kibi maepine siuke, mida lele okanmaike, rokop yalewaka ŋei aboŋ suaine eŋe urataine mage more gegeine mi ge kirowone kebago zokone seuke buratke qake ket mida leleake.

Liwe Liwek Wane Don

¹² No ŋei mane eŋe liwe liwek so umat kine kineo togogole okorayake, eŋe wet pesek desiake, onoka wane, eŋe togogole mage liwe liwek ea yuanka waremaike, ea wane lewine eŋe baŋ gege togon wane marok kibi maepkorop yewa mayake, eamo Anutuŋo ŋei wetene eŋano motpi

paki wetmaep okanka okanmami, enjane binjek qeke.

¹³ Nei mane enjane borikine yalinenjo liwekkaki, iwa yale misuk rayake, “Liwe liwek iwa Anutu wanonjine sarimaike.” Borikinenjo Anutu maine mi liwekkayake, so Anutu onjom nejane mane borikine mayakane mi liwekkayake. Ea midakaka!

¹⁴ No nejane mane enjane liwe liweknjo liwek kamaike, yemo enjane wetnenjo borikine mayakane bailalanj wetke tebaka gemageki liwekka okanmaike,

¹⁵ enjane wetinenjo bailalanj wetke mage mageki, yewano njatke more medep mamaike, yemo enjetine borikine, eso borikinenjo sua ariki paki medep mamaike, yemo enjetine seu seu.

¹⁶ Kima maepkopne njane misuk dere siuke more isinagukei.

¹⁷ Asu wane abonj kine kine maine, so Asu bakom kine kine qelananerop yemo qeliwo njane sari okanmaike, eamo Anutu, qeli qelanan, ma wakon ma wakon welaine, enjano njane sari okanmaike, enjano main qein me qe kupkeki panaman wako wakon eamo mi pamaike.

¹⁸ Anutu enjane enjane wetinane don welenjo nejane njerewekoune ma wakonjonge, nejane doku tau tau magu njane magak okane, alakane nejane so kine kine natne korop ma wakonge, enjane keueno numa maikenane yale okanjonge.

Don Dere Teweke Okanikene

¹⁹ Kima maepkopne, njane iwa detpi! Nei korop njane don dereret wane yemo ikopka ewek

warekei, no don rara so sot osi osi wane yemo dere umarekei.

²⁰ Nei mane sot osi osiŋo Anutu wane masi tanik koboboine yewa mi maratka more ma sorokka okanmaike.

²¹ Ea wane ŋine ŋidom tanik kine kine diinerop so qeguŋ maguŋ oka okan, yewa korop mapapka warekei, paki Anutu wano ketluka bororom ge more miti don koto ŋino mot okanmaike, ea ma nogankaikei, eaŋo oŋa oŋaŋine maine ma menaŋkayake.

²² Anutu wane miti don ketŋinenŋoka dere koto ŋine misuk isikaikei, ŋine dere more wele koto ŋine wetkeu, waketki dere teweke urataine mogare maikaike.

²³ Nei mane eŋe miti don desiake no dere mi ma nogankayake, eŋe yemo nei manenŋo wikingo ma kaitine daleo ea aeke kamaike, eŋe yale.

²⁴ Eŋe kaitine wikingo aek luluk wareki paki qelige arimaikae, pakimo mi azongi eaka kaitine niŋetkamaikae.

²⁵ No nei mane eŋe rara togon don wele, nei siwotongi mayakatne gege, don ea kaululukka detluka, takorakot malipka magemaikae, paki yaup dere qewolon mi okanmaikae, eŋe dere tewek okanmaikae, nei yewa eŋe yale okanmaikane, Anutŋo baŋ mosop kayake.

²⁶ Nei mane eŋe eŋinane detki miti inerop okanmaikae me? Nei yewa eŋe belakaminane diamine mi maki paki ma walukkayake, yemo nei ea wane miti magegeine eamo wele midaine okaniaikae, paki eŋe oŋomka kotine isikayake.

²⁷ Anutu Magakņo mitirop koto libeka, sot midaine gege wane detmaike yemo iwa yale, madu wanap so kosi mala, wikile wakile kutno wet borik geu, ware one kito qesiņ ebukei, so kepeo borikine pamaike, eaņo koto njine maki sigileakane diamņine ma warenagu gekei.

2

Nei Aboņ Midaine So Aboņgorop Rokop Wekuka Okan Onikene

¹ Nanane kimakopne! Njine Waomze Yesu Kristo detlukka malipka gemami, eņe Waom ewe zonominerop, ea wane njine nej gume tanikene didiwo ea onbi paki ea wane rokopko tanik kine mane, ņo mane tanik mane yale yau yaup misuk okan onikei.

² Nei mane aboņine suaine eņe ņamot goliņo mamaine, maki waki takot kibi kibi biraki paki njinane lewa lewago sariake, eso nej mane aboņine midaine, eņe yaleka laplap bara warakine ramu more lewa lewaņjino sariake.

³ Pakimo njine nej aboņ mayakatne au sarike, eņe manerop ewine kitou paki olale raikei, “Met met bile diinne midaine, libeka iwao pese metnom,” ņo nej aboņine midaine eņe yemo olale raikei, “Ge yemda okoranom, me iwa ket sura wetko yaup pese metnom.”

⁴ Njine masi yale okangeiwo yemo, njine sot korop okane more njidomka keuņjino mapo mapok ma wakonikei, so wetnjino wano wanok qotkoine ma wakonikei.

⁵ Kima maepkopne, njine detpi! Anutuņo kepe iwao nej wanap, aboņene, midadaine gemami,

eŋe mali malipenane Asu wane morian marat kau paki Anutu wane gege togon yewa wane welaine okane gekeiwane ma wesak one more eŋane simile dere wetmaep okanka okanmami, eŋane biŋek qeke.

⁶ No ŋine yemo wanap, aboŋene midaine eŋe ma ket biraone ewe mabaik okan onmami! Deo edo umat kutŋino more ŋibu tebaŋune wano wanok ŋei eŋane kaitko dongo biraŋun okanmami? Nei aboŋene suaine edo dongo biraŋun okanmami.

⁷ Nei yewa edo Yesu Kristo eŋet maepine maine ŋibonge, ea ra mabaikka okanmami.

⁸ ŋine qeli ŋei waom wane Rara Togon Don magaine Anutu wane Papiao pamaike, ea teweke magekei, yemo ŋine masi maine okanikei, iwa yale, “Geŋonane simin ganmaiike, yalewaka ki-manŋonane simin ganiake.”

⁹ No ŋine ŋei gume tanikene didiwo onbi paki ea wane rokopko kine kine yuan qewan okan onikeiwo, yemo ŋine borikine mau paki sot korop okanmami, wane rara togon donŋo ŋinane kine qeu wakonmaiike, yemo ŋine rara togon don qe barakmami.

¹⁰ Nei mane eŋe Rara Togon Don korop tewek wareki paki weku yeine qeligeake, eŋe Rara Togon Don korop qe yuan waremaiike so qe barakwareki paki, sot korop okanmaiike.

¹¹ Anutu oŋom rake, “Ŋao ŋanom ŋire misuk qeliŋnagukeik,” oŋomka koso rake, “Ge ŋei misuk qem seukeake.” Ge ŋanom ŋone mi qeliŋ kaikene ŋo siluŋ ge ŋei mane qem seukmaiikeo yemo ge Rara Togon Don qe barake more yuangene.

¹² Rara Togon Donḡo ḡei siwotongi, yaup sot midaine gege yewaḡo ḡei kineene baḡ ma wako- niake, ea wane ḡine don detluke don koboboine raikei so masi koboboine okangei.

¹³ ḡei mane eḡe kimaine mi sesekakeo, yemo Anutuḡo kineine mawakoniake, yewao eḡe mi sesekayake, ḡo sesekakeḡo yemo kine ma wakon ma wakon nasoo togole don yuaniake.

Mali Malipka Wele Midaine Eamo Kine Kine Yauwine

¹⁴ Kimakop! ḡei maneḡo rayake, “Na mali malipne pamaike.” ḡo mauluk mauluk urataine yemo mi mayake, pakimo mali malip yewaḡo maine mapikkayake me? I midakaka!

¹⁵ ḡine kimakopḡine me kiarokop ḡine, eḡe takot laplap wane ḡaḡaekei so ḡara wane seukkei,

¹⁶ ḡo ḡine mayakatne iwa yale edanikei, “Anu- tuḡo mosop ḡungep! Takotḡine birau ket gerewe ḡuniake, so ḡara mauluke nekei!” Ge takot laplap so ḡara mi ebonnom paki don ḡoneḡoka ra edan- nom maine mapik oniake me?

¹⁷ Eso yalinane mali malip eḡineka mageu mi menageake. Mali malip eḡineka payake, so urataine maki weleine masi tanik maineḡo mi wakoniakeo, yemo mali malip yewa, eamo seu seune so wele midaine.

¹⁸ ḡo ḡei natneḡo iwa yale mane raikei, “ḡei mane mali malipine pamaike, ḡo ḡei maneḡo yemo mauluk mauluk urata maine ma- maikē,” don ea wane turuḡine naḡano ḡine yemo iwa yale, “Na sikan nannom, ḡei yewa eḡe mauluk mauluk urata maki wele maine mi

wakon maikenjo daleo mali malip korop geake? Na mali malipnane kine yemo ban urata mamane, so tanik maniknejo sikan ganiake.”

¹⁹ Njine Anutu wekuku gemaiké ea mo malipka more detlukmami me? Weku mane, asu qotkoine eje yaleka malipka okanmami, so kaetongi qise okanmami.

²⁰ Njine qelan! Njine mali malip wane urataine ma more wele maine mi maratka maratka eamo mi oka okane, ea wane kine desikei wane njunmaiké me? Eso yemo iwa yale.

²¹ Njine Abraham, eje sogino daleo okane more Anuturop wenej weku okange? Eje tanik manik maine okange, so gipole Isak ma more aratao Anutu wane soe soep qe misiakane okange, eje yale okangi, Anutujo eje nej koboboine orake.

²² Njine ea mo detmami me? Ejine wetinejo malipka more metinejo urataine rokop weku orodonjka makoik, metinejo urata tingo denjo kaka ea ma okangi, eajo maki mali malipine weku mane okange.

²³ Pakiso Anutu wane Papiao iwa yale ramaike ea wane wele wakonge, “Abramjo Anutu detlukkake, so mali malipinane Anutujo detkaki koboboine okange.” Pakiso Anutujo Abram kimateine orake.

²⁴ Njine mo detmami, ‘Nei mane mali malipinaneka, Anutujo koboboine mi oreake, nej mali malipinerop so urata mamaine so masi tanikine koboboine ea wane Anutu eje nej koboboine orayake.

²⁵ Rokop yewaka bailalanj njerep, Rahab eje

Yuda ñei etke Yosua aṅaine teweke ariuk, Yeriko edo ṅabaore etkukei wane okanbi eṅe kima epu more eṅine matko biraotki paki wareotke, eṅe masi maine okange, so koso numa maneoka sanko biraotki siuke arikoik, ea wane Anutuṅo eṅane detki menaṅge, paki eṅe ma more Anutu eṅine osino birakake.

²⁶ Eso iwa yale, sola Asu midaine, yewa mo seu seune, so rokop yale waka mali malipka eṅe wele midakaka, so urataine midadaine, ñei ea wane mali malip eṅe mo seuke.

3

Belakamze Mauluke Warekaikene

¹ Kimakopne! Nṅinanonṅine loutneṅo kito ebo ebon misuk okanikei, onoka wane ṅine mo detmami, kito ebo ebon ṅene korop baṅ wano wanok ṅeiṅo wanokṅongi paki kineze ma wakone turuṅine zok manerop umatne ṅeboniake, ṅo natne yauwine eṅe yemo ewekine okanoniake.

² Nene koropṅo naso baṅem mo masi qotkoine okan okanmaine, ṅo ñei mane eṅe don raraine eao qotkoine mane mi mamaike, ea weku mane, ñei yalinenṅo maine wet dereret so sola korop warekaki mayakatneka pamaike.

³ Nene horsiṅo donze dere aṅaze tewekeakane ṅetko kiki horsi mane wane aṅaino mot okanmaine, eso ṅene maine maṅem numa diawao ariakane wetkemaine, eaka arimaike.

⁴ Me seki mane wane detpi, seki eṅe zok suaine, wane momo togogole ṅo qe modatki kiwetko arimaike, wiliṅaine nigagatne, wane seki welaine

eŋe numa diawao ariakane wetkemaikē, eaka seki wiliŋaine maingeki arimaikē.

⁵ Eso belakam wane rokop eŋe wekuka pamaikē, eŋe sola korop ea wane sisineine nigagatne, ŋo eŋe solaze kakapa suaine ea wane aŋaŋe zok bokaka okanmaikē, so eŋine detki wawaine manerop okanokanmaikē.

Ŋine gerez ea detkau, eŋe nigagatne, ŋo siluŋ tobo suaine ea zeki paki qe solokki midamaikē!

⁶ Eso belakam eŋe gerez yale, eamo borikine kine kine ea wane nagaine, eao borikine ŋo mat urum solazo mawareki paki waetne motki solaze so wetze so dereretze korop rokopkemaikē, eaŋo gegezane qesiŋ ea korop kiwacki lawe zemaikē, gerez eamo sora gerez eŋino ŋine sarimaikē, yewaŋo puangi zemaikē.

⁷ Ŋei eŋe osom natne zubaine maine ma peseoniake, osom zubaine so naŋi, koma so zawon, eŋe yale okane more eŋine bango biraone more oŋom wareoniake.

⁸ Ŋo siluŋ ŋei maneŋo belakanmine maine mi ma pesekake, eamo borikine so maine mi ma walukkaikene, seu seu wane soa so zonom borikineŋo watke pamaikē.

⁹ Ŋene belakam yewaŋo Waom so Magaze ewine kito okanmaine, so belakam yewaŋoka ŋei kimakopze Anutu eŋine kaittoqaine yale ebuke eŋe soakon okanmaine.

¹⁰ Bakom kito kito don so soa don ere aŋa wekuo ŋineka saket okanmamik, kimakop masi iwa misuk wakonikei!

¹¹ Doku deine wekuo ŋineka doku simile so tabaine ere maine mi sakesikeik.

¹² Kimakop, ñalok eki maneo wele nemuyap mi qeake; wain mulap maneo wele ñalok mi qeake, kiwetño qein ge doku simile momoine mi okaniake.

Dereret Maine Yemo Wetinjine Sarimaike

¹³ Ñinane keunjo ñei mane wetine lolotne, so dereretinerop gemaiké me? Ñei mane wetine lolotne so dereret korop geakeo, eñe gegeine mayakatne, wawaine midaine wetne pesekakatne so wetlot korop geake, ge more wet lot korop so dereret korop ea wane kine sikan ongi ñei eñe kaikéi.

¹⁴ No wetñone kotino sori sorin, sot osi osi so bonép nugunge more nema oka okan payakeo, ge solañone misuk mawa kaikene paki, isi don ra more don welekatne ea ñabakaikene.

¹⁵ Dereret yaline eamo weti qeliwoñine mi sarimaike, eamo kepe wane binjek, ñeiwoñine so satan wanonjine.

¹⁶ Sori sorin so nugu nugun payake, yewao dinbun wiri wiri so borikine kinekine korop yaleka wakone payake.

¹⁷ No wet dereret weti qeliwoñine sarimaike, yemo korop libe libe, so peam gorop, pesekine, so kima kima, wet borikño watke pa more kito motki wele tanik manik maine ea wakongi, wet ea mau paki ñei ñerep korop tanik wekuka okanonikei, so isi me mawa mawaine misuk okanikei.

¹⁸ Ñei pesekine gemami, eñe peam wane waetne ebotpi weleine koboboine gege, ea wakone ebon okanmaike.

4

Kepe Abonj Kima Okanka Okanka

¹ Njaba so tebe kawali keunjino pamaike, ea kine diao njine sarimaike? Eamo njinjine gom riwenjinane similejo waranjaki solanjine korop rokopke more kawali ma okanmaike.

² Njine kine kine ma gekeiwane simile njunmaike, njõ siluj mi ebu ge okanmami, eso njine mo kawali maikai wane ewek okanmami, njine kine kine magekei wane gomnjine zok manerop riwe okanmaike, njõ siluj njine ea mi ma okanmami, eso njine mo ea njaba okan nagu more kawali ma okanmami, njine kine kine ea wane rau paki, Anutu mi mejenka okanmami ea wane.

³ So njine mejenkau paki wele mi maratka okanmami, yemo onoka wane mida, njine wetnjinejo don qotkoine wetke ge okanmami, njine njinjine solanjine qesinjakaiki waneka dere mejenka okanmami.

⁴ Yai, siwa siwap me tako rakot kita kitat nej! Njine kepe wane tanik manik korop kima makei, eanjõ Anutu wane njabaine, njine ea mi detmami me? Mane eje kepeo kine kine korop pamaike, ea kima okanka waremaike, eje Anutu wane njabaine okaniake.

⁵ Njine iwa yale misuk desikei, Anutu wane Papijo don pamaike iwamo don yawwine, don iwa yale ramaike, “Asu Anutujo kotozo motke, yemo enjine binjekka geakane zok wetke manmaike, njõ nej natnejo Asu zonom dereret ebonge, eao togole paki koso zinge more numa wawaine so borikine natne okan okanmami.”

⁶ No wet menaŋ ea mo Anutuŋo ŋebon okanmaike, yemo manerop togogole, eanjo ŋenze wawaine yuanka okanmaike, ea wane Anutu wane Papiao iwa yale ramaike, “Anutu eŋe ŋei wawaine eŋane qesi qesiŋ makok okanmaike, ŋo ketkele yemo wet menaŋ more ebon okanmaike.”

⁷ Ea wane ŋine wetŋine maketpi paki Anutu wane bango gekei, paki Satan mapapkau, eŋe ŋine kakakŋune biraŋune ariake.

⁸ Ŋine Anutu wane osino sarikei, eso eŋe yaleka baŋ ŋinane osoŋino sariake, ŋo natne ŋine borikine mama metenine sauk wareu! Wetko ŋine ratokeu libe qekep, wet etkeka gemami ŋine kepe so qeli numa etke mogasikei me? Midakaka!

⁹ Qom borik okanbi paki arokeu deŋine dokune ketkep, tenik ŋinenjo maingeu aro okangep, batneka gegenjo maingeu wet borik okangep!

¹⁰ Waom wane kaitko wetŋine ma pese ketkele geu, eŋe baŋ ŋibu wa biraŋuniake.

Nei Kimaze Mane Turuŋ Don Misuk Olasikene Ea wane Girem Don

¹¹ Kimakopne ŋine ŋidomka dere worik okan naguwi paki don borikine misuk aukei, ŋei mane eŋe kimainane detki boriki, turuŋine dongo birakayake, eŋe Rara Togon Don wane detki boriki mapapkayake, ŋo ŋine Rara Togon Don ma papkaikei, yemo ŋine Rara Togon don tewe tewek koso manerop mi geu paki turuŋine ebo ebon ŋei okanikei.

¹² Anutu wekuŋo Rara Togon Numa ŋebo ŋebon so Wano Wanok Ŋei gemaik, eŋe wekukuŋo maine ŋebu sese ŋoniake, so ŋengu matali

ņoniake, ņo ņine ma ņeiņo kimaine turuņinane bira kayake?

Wawaine Girem Don

¹³ Ғine ketņine more naņane don iwa detpi, ņine iwa yale ra okanmami, “Ukude me qaeki ņene baņ mat suaine maneo ari koma weku yewa gekene, paki bisnis urata ma more wesi loutne marat kaikene.”

¹⁴ Ғine qaeki gege daleo gekei, eamo mi detluk mami! Ғine yemo kopu ewekine yale, wakongi paki mi azoņgi koso yemdaka toe mida lele ari-maika.

¹⁵ Ғine iwa yale, yemo maine rau menageake, “Waomņo det ņoniakeo, yemo ņene maine wisikaune geņem paki ukude makene me baņ ņado makene.”

¹⁶ Ғo siluņ ukude yemo ņine wawaine okanmami, so mawa nagumami, mawa nagumami korop eamo borimaika.

¹⁷ Eso yalinane ņei mane eņe masi tanik maine mane mi okangi paki eņe mo detmaika eņe sot korop okanmaika.

5

Ғei Aboņ Suaine Eņane Girem Don

¹ Eso iwa yemo ņei aboņņine suaine gemami, ņine ketņine more donne detpi! Wikile wakile kutņino wayake, yewao ņine aroke deņine dokune kesiake!

² Aboņņine korop eamo gotore mida lele ariке, so takot laplap magu suaine eamo kowalalak edo newareu mida leleake.

³ Ninane goli njine so silwa njine mo wenjenminejo zewareke, eso wenjemine zeke eaŋo, yeo baŋ ŋado kineŋine mawakoniake, paki bikumŋine gereŋŋo zemaikē, yale zewareake, njine naso qoi qoine ea bomileki aboŋ suaine ea maguke kutno kutno more wakoi.

⁴ Njine ŋeiwa euŋino urata makoi, eŋe lewine mi qoleongoi, dere worikene ea detonbirap! Urata ŋino wele peike qeturage ge arokeu eŋane aroenejo Anutu, Waom Zonom Welaine eŋane ketino ketki detke.

⁵ Njine gegenjine kepeo gekoi, yemo simile so batneka gege eaŋo qewatŋune pake, njine njidom ŋara loutne ne gemage kakapa okangoi, osom berek yale ŋinguwi seukkei wane naso njine mo bomilemaikē,

⁶ njine ŋei koboboine dongo biraonbi paki en-guwi seukkoi, njine detpi, masi borikine makone, ea Anutu eŋe mi ŋonge lelemaikē so turuŋze mi ŋeboniake, yale detmami me?

Wikile Kutne Bau Wawa Midaine Ge More Waom Meŋenkaikene

⁷ Kima kopne, bau wawa midaine Waom tomaka gemageu lotkeake, ŋara eu mama ŋei mane okanmaikē, njine ŋei ea kau, eŋe ŋara kine kineine maine wakone maniakane bau wawaine midaine kepeine bororom tomaka gemaikē, eŋe koya so kaiwe orodonka okanikeik wane bororom toma gemaikē.

⁸ Njine yaleka bau wawa midaine gekei, paki wetŋine motpi weti wayake, Waom sariakane kaiwe nasoine mo osop okanmaikē.

⁹ Kimakopne, ñine ñidomka dere worik okan-naguwi paki ñaba ñaba misuk okangei, ea wane, Anutuño bañ kineñine misuk mawakoniake, kine mawakon mawakon ñei mo iwa osop, mo sari sakesiakane ewekmaike.

¹⁰ Kimakopne, propet edo mokaka Waom wane pidon wane don rakoi ea desikei, eñe wikile wet borik korop so bau wawa midaine dere gekoi eñane kie tapot ea mogare ñine yaleka wikile so wet borik korop bau wawa midaine dere gekei.

¹¹ Eñe togole more wikile ea bau wawa midaine detkoi, ea wane eñe wet pese enerop ñene yale edoramaine, ñine Hiope togole togoleinane mo det okanmami, so ñado Waomño kine kine qe-watke mange, ea mo det okanmami, Waom eñe qomine raraine so mauluk maulukine zok suaine pamaike.

Ratogole Ratogole Ea Wane Don

¹² Kimakopne, kine kine weku okane gekei, yemo iwa yale, ñine kine kine mane wano more ratogole edane rara eamo misuk okanikei, qeliwo, me kepeo, me kine kine maneo mode more ratogole rara, eamo mi okanikei. Weku raikoi, yemo welekatnane eñe, “welekatneka” raikoi, ño mida wane eñe, “midaka” raikoi, yale okangei, yemo bañ ñado Anutuño turuñine mainge mi ñiboniake.

Ñei Koboboine Mane Wane Meñe Meñen Yemo Zonamine Togole

¹³ Ñinane keuo ñino ñei mane wet borik korop gemaik me? Eñe Anutu meñenkayake Ñei mane

eŋe wetpeseko gemaike me? Eŋe bakom eŋet kito more Anutu mawakayake.

¹⁴ Ninano ŋine ŋei mane zoma kamaike me? Eŋe doku tau tau magu eŋane ŋetne natne edo-raki, sari eŋane meŋenkaikei, so Waom wane eŋetine ora more kelok solaino taukaikei.

¹⁵ Meŋe meŋen iwa mali malip korop mamami, eaŋo zoma ŋei ea ma menaŋkayake, ŋo Waomŋo yemo ma wisikae kaki menageake, so borikine makeo, yemo Waomŋo omakayake.

¹⁶ Ea wane ŋine ŋidomka borikine ŋine rapoke ŋei kimakop ŋine eŋane kaitko qeliŋkaikei, so meŋe meŋenŋo qesi qesiŋ okanikei, yale okanbi paki baŋ menaŋgei, ŋei mainane meŋe meŋen yemo zonomine togogole, eaŋo zoma ŋei maine ma menaŋkayake.

¹⁷ Elaiya eŋe ŋei ŋene yale, eŋe koya mi qeakane meŋe meŋen urata togole mamageki kepo koya mi ketke, yaupka paki koma karewe so koma natparomine okange.

¹⁸ Eŋe koso manerop meŋenkake. Pakiso koso koya qeki kepeo kine kine menaŋge.

Numa Qeyaumami Ŋei Yewa Mainone Numao Biraongene

¹⁹ Naŋane kimakopne! Ninanoŋine ŋei mane eŋe don wele wane numa qeyaumaikao, yemo ŋei manenŋo koso mainka numao birakaki geake.

²⁰ Iwa desikei, ŋei mane eŋe borikine mama mane numaine gotkoino ŋine mainka numa maine birakayake, eŋe borikine mama ea oŋa oŋaine baŋ seu seuo ŋine mainkayake, eŋe eaŋo borikine korop mataliki siuk wareake.

Waom Yesu Wane Sigi Maep Don
The New Testament in the Ono Language of Papua
New Guinea
Nupela Testamen long tokples Ono long Niugini

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Apr 2025 from source files dated 31 Aug 2023

646541a1-8d36-5993-802c-6bb850da5963